

**ANALISIS KONSEP KAFA'AH TERHADAP KEHARMONIAN SUAMI DAN ISTERI
DALAM KONTEKS ISU-ISU SEMASA DI NEGARA BRUNEI DARUSSALAM**

**[ANALYSIS OF THE CONCEPT OF KAFA'AH ON THE HARMONY OF HUSBAND
AND WIFE IN THE CONTEXT OF CURRENT ISSUES IN BRUNEI DARUSSALAM]**

¹ MAZIY'YATUL MUZAYYANAH SAMSUL MUAWAN¹ & SUPRI SUDIN²

¹ Fakulti Syariah Dan Undang-Undang, Universiti Islam Sultan Sharif Ali (UNISSA), Simpang
347, Jalan Pasar Gadong, Bandar Seri Begawan, BRUNEI
Email: zaywho.zw@gmail.com

² Pusat Penataran Ilmu dan Bahasa, Universiti Islam Sultan Sharif Ali (UNISSA), Simpang 347,
Jalan Pasar Gadong, Bandar Seri Begawan, BRUNEI
Email: supri.hjsudin@unissa.edu.bn

*Corresponding Author: supri.hjsudin@unissa.edu.bn

Received Date: 10 November 2023 • Accepted Date: 22 December 2023

Abstrak

Proses kafa'ah pada kebiasaannya berlaku sebelum perkahwinan untuk memilih calon pasangan yang sekuflu dalam pembentukan institusi kekeluargaan yang kukuh. Ini diakui dan dibahas oleh para fuqaha yang mana bertujuan untuk mengelak berlakunya pertelingkahan, pembubaran dan perceraian dalam rumahtangga. Adapun di Negara Brunei Darussalam masih menjadi isu tertinggi dalam statistik kes aduan rumahtangga Bahagian Khidmat Nasihat Rumahtangga (BKNK), Jabatan Hal Ehwal Syariah (JHES), Kementerian Hal Ehwal Ugama (KHEU), atas sebab tiada persefahaman suami dan isteri yang berjumlah 4282 kes (tahun 2016-2021) daripada sebab-sebab kes aduan yang lain. Jadinya penelitian kajian ini membincangkan konsep *kafa'ah* dalam *maqasid syariah* termasuklah kriteria-kriteria *kafa'ah* mengikut empat *madhahib* dan hubungannya dengan perkembangan konteks isu-isu semasa di Negara Brunei Darussalam. Adapun penggunaan kajian ini adalah kaedah kualitatif yang merangkumi kaedah temubual daripada pegawai-pegawai BKNK, JHES, KHEU, analisis dokumen-dokumen dan kes-kes aduan fail BKNK, JHES, KHEU dan pengumpulan data-data dan maklumat daripada kajian perpustakaan.

Keywords: kafa'ah, keharmonian suami dan isteri, perkahwinan, konteks isu-isu semasa.

Abstract

The process of *kafa'ah* typically occurs before marriage to choose a compatible partner for the formation of a strong family institution. This concept is recognized and discussed by Islamic jurists (*fuqaha*) with the aim of preventing disputes, dissolution, and divorce in households. In Brunei Darussalam, it remains a significant issue, as reflected in the statistics of family dispute cases from the Family Counselling Service Division (BKNK), Sharia Affairs Department (JHES), Ministry of Religious Affairs (KHEU), totalling 4282 cases (2016-2021) due to various reasons. Therefore, this research discusses the concept of *kafa'ah* within the framework of Sharia objectives (*maqasid syariah*), including the criteria of *kafa'ah* according to the four *madhahib* (Islamic schools of thought) and its relevance to the development of current issues in Brunei Darussalam. The research methodology employs a qualitative approach, including interviews with officials from BKNK, JHES, KHEU, document analysis.

Kata Kunci: Haji Yahaya bin Daud, Qari, Qariah, Tarannum

Cite as: Mazi'yatul Muzayyanah Samsul Muawan & Supri Sudin. 2023. Analisis Konsep *Kafa'ah* Terhadap Keharmonian Suami dan Isteri dalam Konteks Isu-Isu Semasa di Negara Brunei Darussalam [Analysis of the Concept of *Kafa'ah* on the Harmony of Husband and Wife in the Context of Current Issues in Brunei Darussalam]. *Malaysian Journal For Islamic Studies* 7(2): 49-72.

PENGENALAN

Perkahwinan merupakan langkah awal dalam pembentukan institusi keluarga. Perkahwinan adalah satu-satunya cara bagi suami isteri untuk memelihara keturunan dan melanjutkan kehidupan berkeluarga yang baik dan sihat. Firman Allah *Subhanahu Wa Ta'ala* di dalam Al-Quran, Surah An-Nisa' Ayat 1:

﴿يَا أَيُّهَا النَّاسُ اتَّقُوا رَبَّكُمُ الَّذِي خَلَقَكُمْ مِنْ نَفْسٍ وَاحِدَةٍ وَخَلَقَ مِنْهَا زَوْجَهَا وَبَثَّ مِنْهُمَا رِجَالًا كَثِيرًا وَنِسَاءً وَاتَّقُوا اللَّهَ الَّذِي تَسَاءَلُونَ بِهِ وَالْأَرْحَامَ إِنَّ اللَّهَ كَانَ عَلَيْكُمْ رَقِيبًا﴾

Terjemahannya: “Wahai manusia! Bertaqwalah kepada Tuhan kamu yang telah menciptakan kamu daripada diri yang satu (Adam 'alaihissalâm), Dia (Allah) menciptakan daripada nya pasangannya (Hawa), Dia (Allah) mengembangbiakkan daripada kedua-duanya (zuriat ke turunan) laki-laki dan perempuan yang ramai. Dan bertaqwalah kepada Allah yang dengan namaNya kamu saling meminta serta (peliharalah) hubungan silaturrahim (kaum kerabat). Sesungguhnya Allah adalah Maha Mengawasi (memerhati) kamu..”. (Mushaf Brunei Darussalam dan terjemahannya. (2014). Negara Brunei Darussalam: Pusat Da'wah Islamiyah. Juz 4. Hlm 189)

Sebelum perkahwinan hendaklah didahului dengan persiapan misalnya pemilihan calon-calon pasangan yang terbaik, dengan melaksanakan dan mengutamakan konsep *kafa'ah*

bagi menghindari adanya ketidaksefahaman antara pasangan dalam institusi keluarga, sebagaimana sabda *Rasulullah Sallallahu 'Alaihi Wasalla* daripada *Aisyah Radhiallahu 'anha*: (Ibnu Majah, (t.t): 333. No Hadith 1928)

عن عائشة، قالت: قال رسول الله صلى الله عليه وسلم: «تخيروا لنطفكم، وأنكحوا الأكفاء، وأنكحوا إليهم»

Maksudnya: “Hendaklah kalian membuat pilihan bakal isteri yang terbaik untuk bakal zuriat kalian, hendaklah kalian berkahwin dengan yang sekufu, dan kahwinkanlah mereka dengan perempuan yang sekufu”.

Adapun diantara kriteria-kriteria suami isteri dalam perkahwinan bergantung kepada pemilihan pasangan. Pilihan pasangan yang baik daripada pihak lelaki mahupun pihak perempuan itu mengutamakan aspek agamanya dan akhlaknya, sepertimana dari Abu Hurairah Radhiallahu 'anhu, Nabi Muhammad Sallallahu 'Alaihi Wasallam bersabda: (Al-Qazwini, t.t: 632. No Hadith 1967. (Hasan))

عن أبي هريرة رضي الله عنه قال: قال رسول الله صلى الله عليه وسلم: «إذا أتاكم من ترضون خلقه ودينه فزوجوه، إلا تفعلوا تكن فتنه في الأرض وفساد عريض»

Maksudnya: “Jika datang kepadamu seseorang yang kamu redha akhlak dan agamanya, maka nikahilah dia, Jika kamu tidak melaksanakannya, maka akan terjadi fitnah di muka bumi dan kerosakan”

Abu Al-Hasan (Abu Al-Hasan, t.t:607) memberikan penerangan hadith diatas, jika seseorang itu berkahwin hanya kerana keturunannya dan hartanya dan bukan kerana agamanya dan akhlaknya, maka akan berlaku hasutan syaitan dan kerosakan dalam perkahwinan tersebut, sepertimana dari Abu Hurairah Radhiallahu 'anhu, Nabi Muhammad Sallallahu 'Alaihi Wasallam bersabda: (Al-Bukhari, 1422: 7).

عن أبي هريرة رضي الله عنه، عن النبي صلى الله عليه وسلم قال: «تنكح المرأة لأربع: لمالها ولحسبها وجهالها ولدينها، فاظفر بذات الدين، تربت يداك»

Maksudnya: “Perempuan itu biasanya dinikahi kerana empat perkara: kerana hartanya, kerana keturunannya, kerana kecantikannya dan kerana agamanya. Maka hendaklah kamu pilih kerana agamanya, sebab kalau tidak demikian, maka kamu akan celaka”

Dan perlu difahami bahawa sesiapa yang berkahwin, sesungguhnya dia telah menyempurnakan separuh agamanya sepertimana daripada 'Annas bin Malik berkata, Nabi Muhammad Sallallahu 'Alaihi Wasallam bersabda: (Al-Baihaqi, 2003:340. No Hadith 5100)

عَنْ أَنَسِ بْنِ مَالِكٍ قَالَ: قَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ: « إِذَا تَزَوَّجَ الْعَبْدُ فَقَدْ كَمَلَ نِصْفُ الدِّينِ، فَلْيَتَّقِ اللَّهَ فِي النِّصْفِ الْبَاقِي »

Maksudnya: “Apabila seorang hamba itu berkahwin, maka sesungguhnya dia telah berusaha menyempurnakan sebahagian agamanya, oleh itu hendaklah dia bertaqwa kepada Allah pada sebahagian lagi yang berbaki”.

عن عبد الله بن هرمز، عن محمد وسعيد، ابني عبيد، عن أبي حاتم المزني قال: قال رسول الله صلى الله عليه وسلم: إذا جاءكم من ترضون دينه وخلقه فأنكحوه، إلا تفعلوا تكن فتنة في الأرض وفساد، قالوا: يا رسول الله، وإن كان فيه؟ قال: إذا جاءكم من ترضون دينه وخلقه فأنكحوه، ثلاث مرات .

Maksudnya: “Rasulullah Sallallahu ‘Alaihi Wasallam berkata: Jika datang kepada kamu sesiapa yang kamu redhai agamanya dan akhlaknya maka kahwinkanlah dia. Jika kamu tidak melakukannya maka ia akan menjadi fitnah di bumi dan juga akan berlaku keburukan. Lalu mereka bertanya: Wahai Rasulullah, Jika memang begitu? Lalu Rasulullah berkata: Jika datang kepada kamu sesiapa yang kamu redhai agamanya dan akhlaknya maka kahwinkanlah dia, sebanyak tiga kali beliau menyatakannya”. (Ibnu Al-Dahak -Al-Tirmizi - Abu Isa, 1998:386. No Hadith: 1085 (Hadith Hasan Gharib))

METODOLOGI KAJIAN

Kajian ini menggunakan kaedah kualitatif yang merangkumi: (1) Kaedah temubual daripada pegawai-pegawai Bahagian Khidmat Nasihat Rumahtangga (BKNK), Jabatan Hal Ehwal Syariah (JHES), Kementerian Hal Ehwal Ugama (KHEU) (2) Analisis dokumen-dokumen dan kes-kes fail BKNK, JHES, KHEU, (3) Kajian kepustakaan daripada perpustakaan UNISSA, UBD, KUPUSB, PIBD dan DBP, Brunei Darussalam. Adapun hasil yang ingin dicapai adalah (1) Penjelasan ketidaksefahaman antara suami isteri menjadi penyebab utama permasalahan rumahtangga di dalam perkahwinan. (2) Penjelasan kaitan konsep kafa’ah dengan ketidaksefahaman suami isteri dalam konteks isu-isu semasa dan kesannya dalam pengukuhan institusi keluarga. (3) Menganalisis langkah-langkah penyelesaian bagi fenomena ketidaksefahaman antara suami isteri terhadap pengukuhan institusi keluarga di Negara Brunei Darussalam.

ANALISIS MAQASID SYARIAH DALAM KONSEP KAFA’AH

Pengertian Kafa’ah: Konsep kafa’ah secara langsung bertujuan khususnya untuk keperluan diantara suami dan isteri dalam perkahwinan yang sejahtera. Kafa’ah atau disebut juga dengan *kufu* atau *sekufu* iaitu satu konsep kesamaan, keseimbangan atau kesepadanan taraf dalam sebuah rumahtangga antara suami atau calon suami bersama isteri atau calon isteri berdasarkan

sekufu dalam kriteria agama, martabat, keturunan dan banyak lagi (Kamus Dewan Edisi Ketiga, 2002:841)(Kamus Dewan Edisi Keempat, 2015:841). Adapun kamus arab iaitu *Al-Kaf'un* daripada perkataan kafa'ah yang bermaksud setaraf dan kesamaan diantara kedua pasangan dalam pernikahan dari sudut keturunannya, agamanya, hartanya dan sebagainya sehingga mereka digelar *Tumathilan* (mereka adalah sama atau sepadan). (Ibn Manzur -Abu Al-Fadl - Ibn Mukarram, 1414:139) (Al-Husaini, t.t:390) (Ibnu Sulaiman, t.t:339) (Al-Maliki, 1994:211) (Al-Zuhaili, t.t:6735). *Al-Kaf'un* juga dikaitkan dengan pasangan suami dan isteri yang *Mumathilah Al-Quwwah Wa Al-Sharf* (mereka ada kesamaan dalam kekuatan dan kehormatan) (Abd Al-Hamid Umar, 2008:791). Seseorang yang berkahwin itu mempunyai keseimbangan taraf atau sekufu dengan pasangannya dalam beberapa kriteria-kriteria tertentu sehingga boleh mejauhkan dirinya daripada penyebab rosaknya sebuah rumahtangga (Muhammad Abu Zahrah, 1957:185) dan kafa'ah tidak mempunyai aib jika terjadinya sekufu diantara suami dan isteri dalam kebaikan mahupun keburukan (terkecuali mereka selamat daripada aib dalam perkahwinan tersebut) (Al-Syafi'i, 1950:350). Firman Allah *Subhanahu Wa Ta'ala* di dalam surah Al-Ikhlas ayat 4:

﴿وَلَمْ يَكُنْ لَهُ كُفُوًا أَحَدٌ﴾

Terjemahannya: “Dan tidak ada sesiapa pun yang setara dengannya.” (Mushaf Brunei Darussalam dan terjemahannya, 2014:1678)

Daripada tafsiran ayat di atas menjelaskan bahawa Allah *Subhanahu Wa Ta'ala* hanyalah satu, tidak ada suatu makhluk yang sama denganNya, tidak ada pertolongan, tidak ada kesamaan bagiNya, tidak ada keadilan dan tidak ada yang dapat menandingiNya (Ibnu Abbas, t.t:522) dan pada kesimpulannya Allah *Subhanahu Wa Ta'ala* tidak mempunyai lawanan dan kesamaan denganNya (Ibnu Atiyah, 1422:537). Jadinya perkataan kufu dalam rumahtangga adalah sesuatu yang sepadan dan sama serta lebih memahami dan meningkatkan keserasian atau kesepadanan di antara suami dan isteri dan juga kedua keluarga belah pihak. Daripada *Ibnu Abbas*, Nabi Muhammad Sallallahu ‘Alaihi Wasallam bersabda: (Al-Qazwini, t.t:895. No Hadith 2683).

عن ابن عباس، عن النبي صلى الله عليه وسلم قال: «المسلمون تتكافأ دماءهم وهم يد على من سواهم، يسعى بذمتهم أدناهم، ويرد على أفصاهم»

Maksudnya: “Orang-orang muslim sefuku (sederajat) darah mereka, dan mereka ada perjanjian dengan yang lain, yang terbawah dari mereka menjaga dzimmah (perjanjian) mereka dan (yang teratas) melindungi yang terbawah”

Makna *kufu* daripada hadith di atas adalah tidak menjadi sandaran kepada konsep kafa'ah dalam rumahtangga akan tetapi dengan penjelasan yang lain bahawa setiap individu tidak perlu dibeza-bezakan tanpa menilai latar belakang dan taraf seseorang tersebut (Al-Zuhaili, 2010:299). Kafa'ah dimaknakan persamaan dalam kedudukan pangkat atau harta maka


tidak ada perbezaan dalam tahap kehidupan manusia sedangkan manusia adalah setara atau sama di sisi Allah *Ta'ala* jua. Daripada firman Allah *Subhanahu Wa Ta'ala* di dalam surah Al-Hujarat ayat 13:

﴿يَا أَيُّهَا النَّاسُ إِنَّا خَلَقْنَاكُمْ مِنْ ذَكَرٍ وَأُنْثَىٰ وَجَعَلْنَاكُمْ شُعُوبًا وَقَبَائِلَ لِتَعَارَفُوا إِنَّ أَكْرَمَكُمْ عِنْدَ اللَّهِ أَتَىٰكُمْ ۚ إِنَّ اللَّهَ عَلِيمٌ خَبِيرٌ ۝١٣﴾

Terjemahannya: “Wahai manusia! Sesungguhnya Kami telah menciptakan kamu daripada laki-laki dan perempuan, dan Kami telah menjadikan kamu berbagai-bagai bangsa dan puak supaya kamu berkenalan. Sesungguhnya semulia-mulia kamu di sisi Allah ialah orang yang paling bertaqwa antara kamu. Sesungguhnya Allah Maha Mengetahui lagi Maha Teliti.” (Mushaf Brunei Darussalam dan terjemahannya, 2014:1348)


Seorang manusia yang paling dekat di sisi Allah *Subhanahu Wa Ta'ala* adalah orang yang bertaqwa dan mahu mencapai darjat yang tinggi di akhirat dan di dunia (Ahmad Mustada Al-Maraghi, 1946:143). Setiap manusia mempunyai keinginan wujudnya keluarga yang harmoni kerana keluarga yang *sakinah* mempunyai peranan besar dalam meningkatkan kekuatan masyarakat dalam mengamalkan nilai-nilai agama, keimanan, ketakwaan serta *akhlaq al-karimah* yang mana keluarga juga cerminan dari suatu bangsa yang menjadi penyokong dan pembangkit lahirnya masyarakat dan bangsa (Zahrotun Nafisah-Uswatun Khasanah, 2018:132). Adapun bagi mencapai kekeluargaan yang harmoni mestilah mengetahui lapan konsep iaitu keagamaan, sosiobudaya, cinta, perlindungan, pembiakan, sosial dan pendidikan, ekonomi dan pembangunan alam sekitar (Zahrotun Nafisah - Uswatun Khasanah, 2018:133). Ia juga tergantung daripada kedua pihak suami dan isteri yang mana mereka mestilah memperhatikan tali ikatan sebuah pernikahan khususnya dalam rumahtangga yang *sakinah mawaddah wa rahmah* dan amanah Allah *Subhanahu Wa Ta'ala*. Tali ikatan kerohanian yang mengikat perkahwinan sehingga apabila kasih sayang akan menghilang dan putusny *mawaddah* maka masih ada kerahmatan dan jika kerahmatan tidak menjadi kekal maka masih ada amanah yang mana amanah tetap melindungi kedua pasangan tersebut. (Al-Zuhaili, t.t:6741) (Shihab, 1999: 276).

Rajah 1: 5 Maqasid Syariah dalam Konsep Kafa'ah



KRITERIA-KRITERIA KAFA'AH MENURUT EMPAT MAZHAB

Rajah 2: Kriteria Kafa'ah Menurut Empat Mazhab



Kriteria kafa'ah dalam agama adalah kriteria satu-satunya yang diutamakan bahkan para fuqaha bersepakat ia menjadi satu keyakinan dalam ketaqwaan dan kebaikan (*Al-Taḳwa Wa Al-Sillah*). Adapun kriteria-kriteria kafa'ah yang lain seperti sehat akal fikirannya, nasab keluarga, agama daripada ayahnya dan sebagainya, para fuqaha ada bersepakat yang sama dan ada juga berpendapat tersendiri seperti kriteria-kriteria kafa'ah tersebut tidak termasuk atau tidak perlu dinilai bagi pemilihan pasangan sebagai suami dan isteri. (Mustafa Al-Siba'i, 1965: 170). Para fuqaha meletakkan kafa'ah menjadi salah satu tujuan perkahwinan bagi mengeratkan lagi kehidupan berumahtangga yang *Sakinah Mawaddah Wa Rahmah*. (Khoiruddin Nasution, 2007: 157)

Mazhab Hanafi: Kafa'ah tidak menjadi syarat nikah dan ia bukan harus untuk suami dan isteri. Ia kesepadanan yang khusus atau keadaan perempuan yang rendah daripada lelaki (Ibn Abidin, 2003:206). atau sepadan atau seimbang lelaki dengan perempuan dalam hal tertentu (Abdurrahman Al-Jaziri, 2003:206)

Mazhab Malik: Kafa'ah adalah kesamaan atau kesesuaian antara lelaki dan perempuan dalam agama dan keadaan (Al-Habib, 2005:247), pendekatan dalam agama dan selamat daripada aib yang mengharuskan *khiyar* (memilih). Adapun selamat daripada aib bermaksud selamat daripada aib yang boleh menolak perkahwinan atau mengharuskan pihak perempuan melakukan *khiyar* (Wuzarah Al-Auqaf Wa As-Syu'un Al-Islamiyyah, 1995:266). Kesimpulannya mazhab Maliki membatasi ketentuan kafa'ah kepada dua perkara iaitu agama dan bebas daripada kecatatan atau aib.

Mazhab Syafi'i: Kafa'ah adalah sepadanan atau keseimbangan seorang suami untuk isterinya dalam kesempurnaan atau hinaan selain bebas daripada aib perkahwinan. (Al-Sayyid Al-Bakri, 330). Bahkan wali daripada seorang perempuan mempunyai urusan tentang perempuan tersebut untuk mengetahui perkara-perkara yang berkaitan dengan lebih jelas baginya, maka perempuan itu tidak dinikahkan dengan lelaki yang tidak sekufu kecuali dengan lelaki yang sepadan (sekufu). (Al-Syafi'i, 1990:16)

Mazhab Hanbali: Kafa'ah iaitu keseimbangan atau kesepadanan dalam lima perkara: agama, pekerjaan, kekayaan, kemerdekaan dan keturunan. (Abdurrahman Al-Jaziri, 2003:59)

Kemudian terdapat ikhtilaf daripada fuqaha empat mazhab terhadap konsep kafa'ah dalam perkahwinan. Adapun menurut mazhab Malik, Syafi'i, Hanafi dan satu riwayat daripada Imam bahawa maksud kafa'ah itu hanyalah keutamaan sahaja, ia bukanlah termasuk syarat dan rukun pernikahan dalam Islam dan walaupun pasangan tersebut tidak sekufu akan tetapi perkahwinan mereka tetaplah sah jika memenuhi syarat dan rukun nikah. Lain pula sebahagian ulama termasuklah daripada *Imam Ahmad* yang menyatakan bahawa kafa'ah adalah termasuk syarat sahnya pernikahan dalam Islam. Jika terjadi tidak sekufu atau tidak sedarjat antara lelaki dan perempuan maka mereka tidaklah sah dalam perkahwinan tersebut (Syarifuddin, 2006:141). Dalam kitab *Wahbah Al-Zuhaili* menyatakan ciri-ciri kafa'ah dalam Mazhab *Malikiyyah* ada dua iaitu agama dan keadaan. Keadaan di sini bermaksud keadaan seseorang itu selamat daripada keaiban yang boleh menyebabkan adanya ikhtiyar. Menurut Mazhab *Hanafiyyah* ada enam ciri-ciri kafa'ah iaitu agama, kemerdekaan, nasab, harta dan pekerjaan. Begitu juga menurut *Hanafiyyah* kafa'ah tidak terletak pada keselamatan daripada aib yang boleh membatalkan sahnya perkahwinan seperti penyakit kusta, gila dan sebagainya. Mazhab *Syafi'iyah* pula ada enam ciri-ciri kafa'ah iaitu agama, kesucian, kemerdekaan, nasab, selamat dari keaiban yang boleh menimbulkan ikhtiyar dan pekerjaan. Menurut mazhab *Hanabilah* pula ada empat ciri-ciri kafa'ah iaitu agama, pekerjaan, nasab, dan kemakmuran. (Al-Zuhaili, t.t: 6735)

AGAMA: Agama merupakan keutamaan konsep kafa'ah dalam mewujudkan rumahtangga yang sangat baik apatah lagi melihat seseorang itu daripada keagamaannya, kesuciannya dan ketakwaannya. Ia juga menjadi cerminan seorang muslim yang soleh dan bertaqwa. Begitu juga jika seseorang itu mencari calon pasangan hidup berumahtangga dengan meneliti dan mengetahui adakah agamanya sama sepertinya yang diinginkan atau diharapkan. Islam adalah agama membawa kea rah kebenaran. Islam tidak ada menetapkan aturan kafa'ah tetapi disebabkan ketetapan manusialah adanya ikhtilaf tentang hukum kafa'ah (Al-Hamdani, 2002:15). Hal ini terdapat peringkat untuk menentukan seorang lelaki itu adalah sekufu atau sepadan ataupun tidak sekufu dengan seorang perempuan kerana perbezaan kehidupan latar belakang dan keadaan seseorang tersebut (Muhammad Jawad, 2007: 351). Adapun di dalam Islam untuk memenuhi syarat sahnya pernikahan mengikut syariah, hendaklah seorang muslim atau muslimah memilih calon pasangan suami atau isteri yang beragama Islam terutama sekali ditekankan daripada pihak perempuan kepada pihak lelaki; hal sedemikian lelaki akan menjadi seorang suami yang bertanggungjawab, menjadi ketua rumahtangga, mendidik isterinya serta anak-anaknya dan mencerminkan diri mereka bahawa keluarga mereka itu *sakinah mawaddah wa rahmah* kerana Allah *Subhanahu Wa Ta'ala*. Oleh sebab itulah agama bagi calon suami mestilah dijadikan keutamaan dan faktor pertama dalam pemilihan ciri-ciri kafa'ah. (Musthafa Kamal Pasha, 2002:261)

Maksud ikhtilaf ulama berpendapat tentang kriteria kafa'ah dalam agama iaitu kualiti agamanya dalam Islam dari segi ketakwaannya, kesolehannya atau kezuhudannya. Malah pendapat dari mazhab *Malikiyyah*, *Syafi'iyah*, *Hanafiyyah* dan *Hanabilah* menyatakan agama adalah persyaran kriteria kafa'ah dalam perkahwinan. Sepertimana daripada surah Al-Nur ayat 3 di dalam Al-Quran:

﴿الزَّانِي لَا يَنْكِحُ إِلَّا زَانِيَةً أَوْ مُشْرِكَةً وَالزَّانِيَةُ لَا يَنْكِحُهَا إِلَّا زَانٍ أَوْ مُشْرِكٌ وَحُرْمٌ ذَلِكَ عَلَى الْمُؤْمِنِينَ ٣﴾

Terjemahannya: “Laki-laki yang berzina tidak (patut) berkahwin melainkan dengan perempuan yang berzina atau perempuan musyrik. Perempuan yang berzina tidak (patut) berkahwin melainkan dengan laki-laki yang berzina atau laki-laki musyrik. Dan perzinaan itu diharamkan ke atas orang-orang yang beriman” (Mushaf Brunei Darussalam dan terjemahannya, 2014:887)

Tafsiran daripada *Ibnu Abbas* (Ibnu Abbas, t.t:292) menyatakan ayat ini diturunkan kepada kaum antara para sahabat Nabi Muhammad yang mahu menikahi perempuan-perempuan *Ahl Al-Kitab* dan perempuan-perempuan musyrik yang merdeka. Firman Allah *Subhanahu Wa Ta'ala* di dalam surah Al-Sajdah ayat 18:

﴿أَفَمَنْ كَانَ مُؤْمِنًا كَمَنْ كَانَ فَاسِقًا لَا يَسْتَوُونَ ١٨﴾

Terjemahannya: “Maka adakah orang beriman sama seperti orang fasiq? Mereka tidaklah sama” (Mushaf Brunei Darussalam dan terjemahannya, 2014:1064)

Daripada tafsiran Al-Qinnaui daripada ayat di atas bahawa jelaslah orang yang beriman atau bertaqwa tidaklah seperti orang yang *fasiq* (Al-Qinnaui, 1992:28). Perkataan *fasiq* adalah keluar daripada ketaatan dan keluar daripada *ahkam syariah* secara mutlak dan itu adalah kekufuran (Ahmad Mustafa Al-Marghi, 1946:114). Firman Allah *Subhanahu Wa Ta'ala* dalam Surah Al-Baqarah Ayat 221:

﴿وَلَا تَنْكِحُوا الْمُشْرِكَةَ حَتَّىٰ تُؤْمِنَ وَلَّامَةً مُّؤْمِنَةً خَيْرٌ مِّنْ مُّشْرِكَةٍ وَلَوْ أَعْجَبَتْكُمْ وَلَا تُنْكِحُوا الْمُشْرِكِينَ حَتَّىٰ يُؤْمِنُوا وَلَعَبْدٌ مُّؤْمِنٌ خَيْرٌ مِّنْ مُّشْرِكٍ وَلَوْ أَعْجَبَكُمْ أُولَٰئِكَ يَدْعُونَ إِلَى النَّارِ وَاللَّهُ يَدْعُوا إِلَىٰ أَلْحَنَةِ وَالْغَفْرَةَ بَإِذْنِهِ وَيَبَيِّنُ آيَاتِهِ لِلنَّاسِ لَعَلَّهُمْ يَتَذَكَّرُونَ ٢٢١﴾

Terjemahannya: “(Wahai orang-orang Islam) Janganlah kamu berkahwin dengan perempuan-perempuan musyrik sehingga mereka beriman (memeluk agama Islam) dan sesungguhnya (berkahwin) dengan hamba perempuan yang mu'min lebih baik daripada perempuan merdeka yang musyrik sekalipun keadaannya menarik hati kamu (kerana kecantikan, harta, keturunan atau sebagainya). Dan janganlah kamu kahwinkan (perempuan-perempuan Islam) dengan laki-laki musyrik sehingga mereka beriman (memeluk agama Islam). Dan sesungguhnya seorang hamba laki-laki yang beriman lebih baik daripada seorang laki-laki (merdeka) yang musyrik sekalipun keadaannya menarik hati kamu. Mereka (orang-orang musyrik) itu mengajak ke neraka sedang Allah menjelaskan ayat-ayat keteranganNya kepada manusia supaya mereka mengambil ingatan.” (Mushaf Brunei Darussalam dan terjemahannya, 2014: 89)

Hadith *Rasulullah Sallallahu 'Alaihi Wasallam* daripada *Abdullah bin Harmaz*, daripada *Muhammad Wasaid Ibni 'Abid*, daripada *Abi Hatim Al-Muzni* berkata: *Rasulullah Sallallahu 'Alaihi Wasallam* bersabda: (Ibnu Al-Dahak -Al-Tirmizi -'Abu Isa, 1998:386, No Hadith: 1085 (Hadith Hasan Gharib))

عن عبد الله بن هرمز، عن محمد وسعيد، ابني عبيد، عن أبي حاتم المزني قال: قال رسول الله صلى الله عليه وسلم: إذا جاءكم من ترضون دينه وخلقه فأنكحوه، إلا تفعلوا تكن فتنة في الأرض وفساد، قالوا: يا رسول الله، وإن كان فيه؟ قال: إذا جاءكم من ترضون دينه وخلقه فأنكحوه، ثلاث مرات

Maksudnya: “*Rasulullah Sallallahu 'Alaihi Wasallam* berkata: Jika datang kepada kamu sesiapa yang kamu redhai agamanya dan akhlaknya maka kahwinkanlah dia. Jika kamu tidak melakukannya maka ia akan menjadi fitnah di bumi dan juga akan berlaku keburukan. Lalu mereka bertanya: Wahai *Rasulullah*, Jika memang begitu? Lalu *Rasulullah* berkata: Jika datang kepada kamu sesiapa yang kamu redhai agamanya dan akhlaknya maka kahwinkanlah dia, sebanyak tiga kali beliau menyatakannya”

Ketaqwaan atau *Diyanah* menurut empat mazhab bersepakat bahawa ia adalah salah satu penyeragaman kafa'ah. Ketaqwaan bagi pandangan mazhab Hanafi apabila seseorang yang *fasiq* tidak sekufu dengan perempuan yang *Salihah* dan lelaki yang *Salih*. Begitu juga jika ada seorang perempuan yang solehah nikah dengan lelaki yang *fasiq* sedangkan ayah daripada perempuan tersebut juga seorang *fasiq* maka tetaplah sah pernikahan mereka dan ayah perempuan itu tidak dapat menghalangi perkahwinan tersebut kerana ayah daripada perempuan itu setaraf atau sama dengan lelaki yang *fasiq* tersebut. (Abdurrahman Al-Jaziri 2003:55). Persamaan akhlak dan agama dalam kriteria kafa'ah sangatlah dekat dan tepat dalam maqasid syariah bahkan ini salah satu menurut daripada mazhab Maliki (Gustiawati, Syarifah dan Novia Lestari, 2016:42). Menurut pandangan mazhab Maliki bahawa kriteria kafa'ah ini dianggap mengikut kesesuaian dengan keadaan zaman sekarang iaitu zaman yang memandang sama rata kesemua mata pencarian dalam pekerjaan yang halal.

Menurut mazhab Hanafiyyah sahaja bahawa kriteria kafa'ah dalam agama Islam mestilah seseorang itu asal usul beragama Islam ataupun ayah dan datuknya yang beragama Islam. Pasangan lelaki dan perempuan adalah sekufu atau sepadan jika keduanya Islam begitu juga sekufu jika lelaki Islam dengan perempuan *Ahl Al-Kitabiyyah* atau *Al-Yahudiyyah* atau *Al-Nasraniyyah*. Namun sebaliknya, tidak sekufu jika lelaki Islam bersama dengan perempuan *Al-musyrikah* atau *Al-Muharibah*. Apabila lelaki Islam daripada keturunan Arab tetapi ayahnya kafir tetap sekufu dengan perempuan Muslimah dan ayahnya seorang muslim, sebaliknya jika lelaki Islam yang bukan daripada keturunan Arab adalah tidak sekufu dengan perempuan Muslimah walaupun ayahnya muslim. Bahkan tidak sekufu jika lelaki muslim dan ada seorang ayah muslim dengan perempuan Muslimah dan mempunyai dua orang ayah, sebaliknya mereka pasangan sekufu jika lelaki muslim dan mempunyai dua orang ayah beragama Islam dengan

perempuan Muslimah dan mempunyai dua orang ayah *muslimani*; kerana nasabnya sempurna mempunyai *Al-'Ab* dan *Al-Jad*. (Al-Marghinani, 2006:485). Adapun daripada mazhab Maliki (Al-Qurtubi, 2004:73), bahawa tidak ada ikhtilaf jika seorang ayah menikahkan anak perempuannya dengan lelaki peminum *khamr* atau lelaki yang *fasiq* jadinya anak perempuan itu berhak untuk menolak lelaki tersebut dan hakim hendaknya membatalkan perkahwinan tersebut daripada tuntutan pembatalan pernikahan daripada si perempuan. Begitu juga jika ia mengahwini anak perempuannya dengan lelaki yang menghasilkan atau bekerja daripada perkara-perkara haram atau lelaki yang suka menakut-nakutkan dan mengugut dengan perceraian. (Slamet Abidin dan Aminuddin, 1999:53). Pandangan Mazhab *Syafi'i* pula tidak sekufu dengan perempuan yang menjaga kehormatannya bagi seorang lelaki yang *fasiq* kemudian melakukan penzinaan. Sebaliknya jika lelaki tersebut peminum *khamr*, berbohong dan tidak melakukan zina kemudian dia bertaubat maka ia masih dikatakan sekufu dengan perempuan yang solehah dan istiqomah (Al-Jaziri, 2003:58). Mazhab Hambali pula menyatakan lelaki yang *fasiq* adalah seorang yang durhaka dan tidak sekufu dengan perempuan yang solehah serta menjaga kehormatannya. Ini kerana orang yang *fasiq* tidak akan menerima kesaksian dan periwayatannya kerana kekurangan dan kemanusiaannya (Al-Jaziri, 2003:59). Lengkaplah lelaki itu dengan kesolehannya dan ketaqwaannya (Aqlah, 2002:381) seperti seorang lelaki yang muslim, soleh, penyayang dan tidak *fasiq* (Hajah Nur Anisah Syahirah, 2015:62). Berpegang kepada kriteria kafa'ah dalam agama adalah lebih baik dibandingkan berbanding dengan kafa'ah dalam nasab dan harta kerana fasik itu menyebabkan keaiban. Perempuan akan merasa aib dan terhina jika lelaki berbuat *fasiq* dan ia melebihi kehinaan dalam nasab. Justeru orang yang *fasiq* ini akan tertolak kesaksiannya dan tidak bertanggungjawab terhadap diri dan hartanya (Muhammad Zaidān, 2009:381). Lelaki *fasiq* tidak sekufu dengan perempuan solehah atau dengan perempuan yang fasik (perempuan fasik daripada ayah yang *fasiq* atau ayah yang soleh).

NASAB: Nasab adalah salah satu yang menjadi ikhtilaf dalam kriteria kafa'ah dalam nasab atau keturunan. Adapun terdapat dua pendapat mengenai nasab di dalam kriteria kafa'ah iaitu: Pertama, mensyaratkan nasab dalam kafa'ah dan ini daripada pendapat *Syafi'iyah*, *Hanafiyyah* dan *Hanabilah*. Kedua, menurut jumbuh pula nasab adalah dikira dalam mengukur kafa'ah (Al-Zuhaili, t.t:229).

Dengan kata lain, kafa'ah adalah bertujuan bagi melindungi perempuan dan keluarga mereka daripada perspektif masyarakat atau keluarga yang secara langsung atau tidak yang beranggapan negatif. Tambahan pula, tidak boleh ada paksaan kepada perempuan yang akan dikahwinkan dengan lelaki yang tidak sekufu padahal perempuan tersebut berhasrat ingin mempunyai keturunan yang sekufu dan sepadan dengannya. Begitu juga tiada paksaan persetujuan pernikahan daripada wali perempuan dengan kedua pasangan yang tidak sehaluan atau tidak sekufu (Muh Ilham Azis-Achmad Musyahid-Fatmawati, 2021). Perincian yang kedua dari kriteria kafa'ah seperti yang ditetapkan dalam mazhab yaitu dalam hal nasab, bahwa orang Arab adalah kafa'ah dengan orang Arab, suku Quraisy adalah kafa'ah dengan Quraisy lainnya, namun Orang Arab biasa tidak kafa'ah dengan orang-orang dari suku Quraisy. (Sabiq, 2010: 400). Adapun keislaman orang tua atau nenek dan seterusnya *'ila al-A'la* menjadi kebanggaan tersendiri daripada orang-orang kafir kerana orang yang baru memeluk Islam tidak sepadan dengan orang yang mempunyai bapa atau nenek dan *'ila al-A'la* yang memang

beragama Islam. Bahkan bangsa Arab kebanyakannya memandang kriteria kafa'ah dari segi nasab kerana mereka lebih membanggakan keturunan Arab mereka sendiri (Ahmad Azaim Ibrahimy-Nawawi-Muh, 2020:132). Selain itu, keturunan juga dilihat dari segi cara kehidupan keluarga bagi mewarisi generasi dalam keutamaan akhlak dan ciri-ciri baik yang terdapat daripada ibubapa sendiri (Ahmad Royani, 2013:103)

MERDEKA: Para fuqaha daripada tiga mazhab *Syafi'iyah*, *Hanafiyyah* dan *Hanabilah* bersepakat bahawa merdeka adalah salah satu kriteria kafa'ah; sekufu jika perempuan merdeka dengan lelaki merdeka dan tidak sekufu jika perempuan merdeka dengan lelaki budak walaupun sudah dimerdekakan tuannya. Menurut mazhab *Maliki* pula merdeka bukanlah syarat dalam kriteria kafa'ah. Firman Allah *Subhanahu Wa Ta'ala* dalam Surah Al-Nahl ayat 75:

﴿ضَرَبَ اللَّهُ مَثَلًا عَبْدًا مَمْلُوكًا لَا يَقْدِرُ عَلَىٰ شَيْءٍ وَمَن رَّزَقْنَاهُ مِنَّا رِزْقًا حَسَنًا فَهُوَ يُنْفِقُ مِنْهُ سِرًّا وَجَهْرًا هَلْ يَسْتَوُونَ الْحَمْدُ لِلَّهِ بَلْ أَكْثَرُهُمْ لَا يَعْلَمُونَ ٧٥﴾

Terjemahannya: “Allah membuat satu perbandingan seorang hamba abdi yang dimiliki orang, yang tidak berkuasa melakukan (dengan bebasnya) sesuatu pun dan seorang (merdeka) yang Kami kurniakan kepadanya rezeki yang baik (harta kekayaan) daripada Kami maka dia pun membelanjakan hartanya itu (dengan bebasnya) secara bersembunyi dan berterang-terangan, adakah mereka itu sama? (Tentulah tidak). Segala pujian untuk Allah tetapi kebanyakan mereka (yang musyrik) tidak mengetahui (hakikat itu).” (Mushaf Brunei Darussalam dan terjemahannya, 2014: 679)

HARTA: Kriteria kafa'ah dalam harta bukan dipandang seorang lelaki itu kaya atau miskin, tetapi melihat kepada lelaki tersebut berkemampuan untuk membayar dan memberikan mahar dan nafkah kepada calon isterinya (Al-Marghinani, 2006:484). Mazhab Hanbali bersepakat harta termasuk kriteria kafa'ah kerana jika perempuan berkahwin dengan lelaki yang miskin hartanya akan menyusahkan isterinya dalam memberikan dan memenuhi perbelanjaan nafkah. Beberapa Mazhab Malikiyyah berpendapat harta termasuk kriteria kafa'ah yang mana jika lelaki tidak mampu memberikan nafkah kepada isterinya dan ada faktor kemiskinan maka boleh perkahwinan itu dibatalkan oleh ayah si perempuan tersebut. Hanafiyyah pula menyatakan lelaki dan perempuan itu sekufu jika lelaki tersebut mampu membayar maskahwin dan nafkah. Sebaliknya jika tidak mampu demikian atau salah satunya maka tarafnya tidak sekufu (Rusyd, 2007:427). Ini kerana taraf yang senang dilihat dan dilakukan atas kemampuan seseorang untuk menampung nafkah itu tidak boleh Nampak daripada keadaan ayahnya sendiri (Umar Faruq Thohir, 2018:77). Sebahagian fuqaha bersepakat kriteria kafa'ah dalam harta adalah dipandang kemampuan seseorang untuk membayar dan memenuhi nafkah dalam rumahtangga. Kebanyakan masyarakat merasa bangga dengan adanya keturunan dan harta kekayaan walaupun kualiti seseorang itu daripada diri sendiri dan amal solehnya. (Sabiq, 1981:130)

PEKERJAAN: Tidak akan dianggap sekufu jika perempuan mempunyai pekerjaan yang berpangkat tinggi dan terhormat bersama dengan lelaki yang tidak mempunyai pekerjaan tetap dan terhormat seperti salah satu keterampilan pekerjaan yang rendah iaitu penenun, tukang

bekam, tukang sapu, tukang sampah dan sebagainya. Hal demikian mempunyai sebab apabila dipandang dan dinilai dari segi kebiasaan atau adat kerana pekerjaan adalah suatu perkara yang terhormat akan tetapi ada juga hal tersebut tidak dinilai atau dipandang di tempat dan waktu yang lain (Qudamah, 2012:297). Banyak juga daripada pandangan masyarakat pada kebiasaannya dengan mereka memilih dan mengutamakan orang-orang *fasiq* daripada orang-orang *mu'min* hanya disebabkan memandang kepada harta yang banyak dan taraf tinggi orang tersebut. (Al-Mishri, 2010:264)

TIADA KEAIBAN: Menurut Al-Syarbini menyatakan tiada keaiban daripada lelaki, dengan kata lain tiada kecacatan lelaki seperti gila, penyakit kusta, lemah syahwat, sopak, mati pucuk atau kemaluan terpotong (majbub) yang boleh terjadi fasakh dalam perkahwinan atas permintaan isterinya di mahkamah (Al-Syarbini, 1994). Jika datang kepadanya keaiban atau aib salah satu diantara kedua pasangan, maka antara keduanya boleh fasakh perkahwinan tersebut. (Al-Zuhaili, 1997:6755) Kalau seorang lelaki mengetahui aib calon isteri tersebut sebelum perkahwinan maka tidak harus baginya untuk tetap menikahnya kecuali lelaki itu redha terhadap aib yang ada daripada perempuan tersebut maka bolehlah dia melanjutkan pernikahannya. Begitu juga sebaliknya tetap sama untuk pihak perempuan yang mengetahui aib calon suaminya (Al-Shairazi, 1996:264). Kriteria kafa'ah atas sebab kecatatan seperti lumpuh sebelah tangan atau kaki, buta dan sebagainya boleh membawa keaiban kepada perempuan yang sempurna tubuh badannya. (Miszairi, 2018:52–69). Tuntutan dalam pernikahan yang berkaitan dengan sekufu atau kesetaraan antara suami dan isteri adalah untuk menjauhi daripada munculnya keaiban dalam perkara-perkara tertentu.

MATLAMAT KAFA'AH DALAM RUMAHTANGGA

Menjaga Jiwa (*Hifz Al-Nafs*): *Hifz Al-Nafs* adalah salah satu perlindungan diri manusia untuk menegakkan dan menyelamatkan hak-hak kehidupan mereka dengan sebaiknya. Ia juga mendorong manusia bertanggungjawab menjaga keselamatan untuk tidak mendatangkan kemudaratan dan kebinasaan diri sendiri dan orang lain. Ini juga termasuk hak penyelenggaraan juga perlindungan kebebasan dalam melakukan apa sahaja perbuatan seperti kebebasan dalam berfikir, bercakap, tempat tinggal, makan minum dan banyak lagi dalam hak asasi manusia. Nyawa manusia merangkumi pelbagai aspek yang mesti dilindungi seperti apa yang boleh dilihat dan apa yang boleh disentuh oleh deria. Begitu juga dalam aspek rohani seperti nyawa, akal, hati, emosi, perasaan, nafsu dan sebagainya dan jasmani seperti pancaindera dan seluruh badan. Sepertimana firman Allah *Subhanahu Wa Ta'ala* dalam surah Al-Baqarah ayat 195:

﴿وَأَنْفِقُوا فِي سَبِيلِ اللَّهِ وَلَا تُلْقُوا بِأَيْدِيكُمْ إِلَى التَّهْلُكَةِ وَأَحْسِنُوا إِنَّ اللَّهَ يُحِبُّ
الْمُحْسِنِينَ ١٩٥﴾

Terjemahannya: “Dan belanjakanlah (harta yang ada pada kamu) pada jalan Allah dan janganlah kamu sengaja menjerumuskan diri kamu sendiri ke dalam kebinasaan. Dan berbuat baiklah kamu kerana sesungguhnya Allah menyukai orang-orang yang berbuat kebaikan” (Mushaf Brunei Darussalam Dan

Terjemahannya, 2014:77)

Hifz Al-Nafs termasuk menjaga hak-hak kehidupan harapan kebahagiaan diri sendiri dan keluarga dengan mencegah daripada perbuatan-perbuatan yang hina dan buruk kerana agama Islam memberikan perlindungan selama mana setiap individu mempunyai social kehidupan mahupun kebebasan dalam pekerjaan (Ashwab Mahasin, 2020:28). *Hifz Al-Nafs* menjadi peranan yang sangat penting untuk memudahkan manusia menjalankan tanggungjawab dari segi memelihara kesihatan mental fizikal dan keselamatan daripada penyakit atau sesuatu yang boleh merosakkan tubuh badan di dunia dan di akhirat (Azme Matali – Nor Hafizah, 2019:60: Hajah Siti Khadzinah – Hajah Norashikin, Bab 2.). Kafa'ah boleh menjaga jiwa kedua pasangan dan orang yang terdekat (ahli keluarga). Terutama sekali jiwa daripada *zahiriyyah* dan *batiniyyah* seperti perasaan hati, akal fikiran, mental dan fizikal seseorang. Jiwa dari segi bahasa adalah hati manusia begitu juga dari maksud lain adalah roh manusia. Mempunyai jiwa yang tenang boleh melahirkan seseorang yang baik dan bersabar. Kaitan dengan kafa'ah dan menjaga jiwa dari segi maqasid syariah adalah keseimbangan dan ketepatan antara dua pasangan dan tidak menjejaskan kemudharatan dalam perkahwinan terutama sekali pembubaran perkahwinan dan bergaduhan rumahtangga. Ia juga menjaga jiwa kemasyarakatan dan mempertahankan hal ehwal kekeluargaan syariat Islam.

Menjaga Agama (*Hifz Al-Din*): *Hifz Al-Din* adalah melindungi seseorang yang dipertanggungjawabkan sebagai mukallaf untuk melaksanakan suatu yang diamanahkan, dijauhkan dan terhindar daripada fitnah serta kesalahpahaman tentang agama. Manusia diamanahkan untuk tidak menyesatkan agama yang dianuti oleh seseorang dan melakukan penghinaan tentang agamanya, bahkan Allah *Subhanahu Wa Ta'ala* mengharamkan manusia untuk membentuk apa-apa sahaja dengan kemungkaran dan kerosakan di dunia ini. *Hifz Al-Din* bertujuan terpelihara daripada murtad dan berperang atau membunuh orang lain (Al-Qurāfi, 1995:3255) (‘Abi Al-Qāsim, 1986:119). Firman Allah *Subhanahu Wa Ta'ala* daripada surah Al-Taubah ayat 29:

﴿قَاتِلُوا الَّذِينَ لَا يُؤْمِنُونَ بِاللَّهِ وَلَا بِالْيَوْمِ آخِرٍ ۚ أُولَٰئِكَ هُمُ الْفٰسِقُونَ ۝۲۹﴾

Terjemahannya: “Peragilah orang-orang yang tidak beriman kepada Allah dan tidak (beriman) kepada hari Akhirat..” (Mushaf Brunei Darussalam Dan Terjemahannya, 2014:459)

Pegangan agama Islam menjadi pegangan utama yang mesti dimiliki oleh manusia kerana agama boleh mengatur perjalanan hidup manusia kearah yang sempurna dan teratur dan ia menjadi suatu kewajiban untuk memeliharanya dan mengelak daripada perkara-perkara yang boleh merosakkan aqidah Islam (Azme Matali – Nor Hafizah, 2019:48). Perkahwinan adalah ibadah dilakukan supaya menjaga agama yang mana taat kepada perintah Allah *Subhanahu Wa Ta'ala* dan RasulNya dan menjauhi daripada laranganNya. Sekufu atau sepadan antara pasangan itu jika melakukan ibadah bersama-sama akan mendapatkan keberkatan dan perlindungan Allah *Subhanahu Wa Ta'ala*. Maka jelaslah kesepadanan atau sekufu pasangan itu mempunyai menjaga agama.

Menjaga Keturunan (*Hifz Al-Nasl*): *Hifz Al-Nasl* pula mempunyai larangan perzinaan dan memerlukan hukuman had jika terjadi perzinaan. Bahkan memerlukan sokongan, perpaduan dan kerjasama kerana jika tiada larangan dan hukuman had tersebut maka tidak menjadi suatu *Adah* dalam kehidupan (Al-Zarkashī, 1994:266). Adapun *Hifz Al-Nasl* adalah satu keperluan manusia seperti memelihara seorang lelaki daripada mengebiri atau terpelihara daripada meninggalkan perempuan dan berpegang teguh untuk membujang selamanya atau seperti memelihara perempuan daripada memotong sebahagian anggota rahim atau memotong payudara ataupun keduanya yang boleh membawa kematian, kemudaratannya dan sebagainya. (Al-Tūnisi. 2004:139). *Hifz Al-Nasl* adalah pemeliharaan keturunan dan juga memelihara maruah dengan menjaga perkahwinan dengan teliti dan teratur bagi pembentukan gambaran, akhlak dan kedudukan yang sangat baik juga yang diharapkan oleh masyarakat. (Azme Matali – Nor Hafizah, 2019:70)

Menjaga Akal (*Hifz Al-Aql*): *Hifz Al-Aql* merupakan objektif Maqasid Syariah dalam memelihara akal dengan perkembangan akal fikiran yang sehat dengan memikirkan kebesaran dan ciptaan Allah *Subhanahu Wa Ta'ala*, menuntut ilmu pengetahuan dan sebagainya (Azme Matali – Nor Hafizah, 2019:70). Al-Tunisi yang menyatakan *Hifz Al-Aql* melindungi akal fikiran seseorang daripada kecacatan seperti melindungi akal daripada melakukan rasuah dan ia juga boleh berkaitan yang disebabkan seperti mabuk, dadah, dan sebagainya (Al-Tunisi, 2004:139). Pada umumnya, semua orang mahu memilih pasangan yang sepadan atau sekufu supaya senang memahami keadaan pasangan dan pendapatnya selepas perkahwinan. Kesefahaman sewajarnya menjadi kepentingan utama dalam rumahtangga supaya tidak terjadi ketidaksefahaman atau pergaduhan antara keduanya. Jadinya kafa'ah boleh menjaga akal fikiran pasangan sebelum dan selepas perkahwinan. Akal adalah keutamaan manusia untuk mengetahui kebaikan dan keburukan sesuatu perkara apatah lagi dalam perkahwinan yang mana akan hidup bersama seseorang sebagai suami atau isteri. Kesihatan akal itu perlu ada pada setiap pasangan rumahtangga kerana kesihatan mental fikiran seseorang itu akan mencerminkan dirinya, akhlaknya dan kesihatannya dari segi jasmani dan rohani. Jika seseorang itu mempunyai banyak fikiran yang positif dan sehat maka jelaslah dia boleh bijak melakukan suatu perkara dan bertahan dalam pukulan permasalahan yang akan dihadapinya.

Menjaga Harta (*Hifz Al-Mal*): *Hifz Al-Mal* mempunyai dua perkara iaitu pertama: terlindungi daripada jaminan kepada orang yang melampaui batas kerana harta adalah asas kehidupan manusia dan kedua: terjaga daripada perbuatan *sariqah* dalam harta manusia. (Abu nAbdullah Badr Al-Din Muhammad Al-Zarkashi, 1994:266) *Hifz Al-Mal* juga dengan cara mengikuti adab-adab Islam (Al-Tunisi, 2004:139). *Hifz Al-Mal* pula dipelihara oleh *syara'* dalam jaminan dan hudud (Al-Qurafi, 1995:3255) (Abi Al-Qasim, 1986:119). *Hifz Nasab* terjaga daripada hukum larangan zina kerana percampuran zuriat nasab yang boleh membawa terputusnya ikatan hubungan anak dan membawa kerosakan kemaluan yang melampaui batas (Al-Qurafi, 1995:3255). *Hifz Al-Mal* adalah melindungi harta kekayaan masyarakat daripada kepunahan, kehancuran, keralihan secara haram atau tidak sah terhadap ketidakadilan dalam hak-hak tertentu. Menjaga harta dalam perkahwinan adalah terbentuk perlindungan terhadap isteri dan anak-anak dalam keluarga seperti hak-hak nafkah dan harta waris. Adapun *Hifz Al-Mal* sangat

berkesan dalam konsep kafa'ah yang mana jika kesepadanan atau sekufu antara kedua pasangan maka tidak terjadi permasalahan yang panjang dalam kewangan dari segi keadilan ekonomi keluarga termasuk nafkah atau waris, meningkatkan taraf kehidupan selama mana memahami keadaan dan status kehidupan bersama suami atau isteri dan sebagainya.

Sebab-Sebab Aduan Perselisihan Rumahtangga Tanpa Kriteria-Kriteria Kafa'ah Dalam Konteks Isu-Isu Semasa Di Negara Brunei Darussalam.

Rajah 1: Statistik Sebab-Sebab Aduan/Masalah Rumahtangga daripada Bahagian Khidmat Nasihat Rumahtangga (BKNK), Jabatan Hal Ehwal Syariah (JHES), Kementerian Hal Ehwal Ugama (KHEU).

SEBAB-SEBAB ADUAN / MASALAH RUMAHTANGGA	2016	2017	2018	2019	2020	2021	JUMLAH
1.Tiada Persefahaman	240	173	166	204	206	172	1161
2.Pengabaian Nafkah/ Tanggungjawab	148	143	114	121	131	94	751
3.Hubungan Dengan Orang lain	60	99	82	87	47	44	419
4.Isteri Tidak Taat / Keluar Rumah	40	60	80	58	27	22	287
5.Suami Memukul Isteri/ Keganasan dlm Rumahtangga	35	49	32	43	22	18	199
6.Sering Bertengkar	42	49	36	50	16	33	226
7.Suami Pemarah / Panas Baran	33	16	25	25	21	14	134
8.Tidak Bersekedudukan dlm tempoh yg lama	0	69	60	80	58	43	310
9.Terlibat Dengan Dadah/ Islah	23	14	25	19	17	7	105
10.Suami Atau Isteri Balik ke Negara Asal /Ghaib/Tidak diketahui	16	25	19	21	34	17	132
11.Masuk Penjara	24	12	22	22	15	10	105
12.Campurtangan Keluarga	20	7	11	3	4	3	48
13.Masalah Poligami	12	7	8	8	2	2	39
14.Masalah Zuriat	0	0	0	0	0	0	0
15.Sebab-sebab lain	31	57	55	71	75	77	366
JUMLAH	724	780	735	812	675	556	4282

BKNK, JHES, KHEU

Merujuk kepada rajah 1 iaitu tiada persefahaman suami dan isteri dan merupakan sebab aduan masalah rumahtangga yang tertinggi di Negara Brunei Darussalam. Sebab tiada persefahaman menjadi salah satu adanya tidak sekufu diantara kedua pasangan sehingga wujudnya konflik dalam rumahtangga. Pada amnya, tiada persefahaman suami dan isteri juga dimaksudkan salah faham yang kerap terjadi apabila seseorang memicu atau melihat apa yang sekufu baginya pada satu bahagian semata-mata (Aiman-Dr.Harlina Halizah, 1:26) seperti dari segi kewangan; lelaki yang berpendapatan mestilah sama dengan pendapatan perempuan maka itu dikatakan sekufu. Padahal keserasian pasangan suami dan isteri boleh sekufu dari segi pelbagai sudut kerana satu sudut tidak menjanjikan kekal perhubungan dalam persamaan atau keserasian pasangan. Adapun pergaduhan, perselisihan faham dan berbeza pendapat adalah perkara biasa yang terjadi sehingga tidak berlanjutan kearah perpecahan atau peperangan jika mereka mempunyai kekufuan (Aiman-Dr.Harlina Halizah, 1:28). Namun boleh melibatkan perceraian jika terlalu lama hubungan tersebut menjadi sangat konflik dan berpegang kepada ego yang kuat sehingga banyak melibatkan keaiban dan keburukan dan tidak boleh lagi berbincang bersama untuk menyelamatkan rumahtangga mereka sendiri.

Masalah Kesihatan: Aspek kesihatan pada masa sekarang menjadi salah satu kepentingan dalam rumahtangga. Mengekalkan kehidupan yang baik adalah meneruskan gaya hidup yang sehat sejahtera bagi individu itu sendiri mahupun bersama pasangannya serta mengetahui dan

menerapkan tanggungjawab secara fizikal dan mental ataupun zahiriyyah dan batiniyyah yang boleh menjauhkan diri sendiri daripada masalah ataupun risiko yang akan datang dalam sebuah perkahwinan. Informan 1 dan 4 menyatakan kejujuran itu penting bagi setiap pasangan suami dan isteri apalagi sebelum terjadinya perkahwinan, lebih baik berterus terang jika mereka atau keduanya mempunyai penyakit-penyakit tertentu. Informan 4 meringkaskan dan menyatakan: *'mulut berkata 'ya, hati berkata 'tidak' jadinya tidak ada kejujuran..'*. Mengetahui perkara yang sebenar diawal hubungan pasangan membolehkan mereka untuk bersedia dan menerima kekurangan serta risiko masing-masing di masa akan datang. Adapun informan 1 mengatakan bahawa setiap pasangan mempunyai matlamat sendiri dan perlulah jelas bagi melengkapkan matlamat tersebut seperti menginginkan zuriat,: *"Hal sedemikian perlunya ada usaha dengan memastikan kesihatan suami dan isteri dan tidak mempunyai penyakit yang boleh menghalang daripada mempunyai anak bagi memenuhi matlamat yang akan diinginkan atau dicapai"*. Jadinya meneliti kafa'ah dari segi kesihatan boleh memberikan pengetahuan atau *aware* bahawa orang yang akan dijadikan suami atau isteri itu dalam keadaan sehat ataupun keadaan yang kurang sehat dan seumpamanya; sepertimana informan 3 menyatakan bahawa kafa'ah sebaik-baiknya diteliti juga dalam kesihatan untuk mengelak perceraian, *"..sebab yang penting apa yang berlaku selepas pernikahan.."* dan ini dipersetujui oleh informan 2. Bagaimana pun setiap manusia pernah sakit atau mempunyai masalah kesihatan yang mana setiap pasangan mestilah bersedia, sabar dan redha jika berlaku masalah kesihatan sehingga tidak merasa ada paksaan untuk bertanggungjawab lagi memudaratkan mental dan fizikal kedua pasangan sepertimana informan 2 mengatakan masalah kesihatan boleh memberi kesan dalam rumah tangga: *"..badannya, jiwanya, pemikirannya yang menjadi sempit.."*

Mempunyai Jarak Umur Yang Jauh: Kriteria kafa'ah dalam aspek umur boleh menyebabkan ketidaksefahaman suami dan isteri bahkan perbezaan umur yang sangat ketara. Informan 1 menambahkan dan menyatakan: *"Kawin dalam umur yang muda boleh dikaitkan dengan jiwanya yang sangat muda dan suka kebebasan sehingga boleh mengabaikan tanggungjawab yang seharusnya dilakukan sebagai suami atau isteri serta ia boleh disebabkan fikiran yang belum lagi matang"* dan informan 2 juga mempersetujuinya. Dengan umur yang masih muda maka mereka masih ada campur tangan daripada ibubapa dan ahli keluarga bahkan merekalah yang memutuskan pilihan atau pendapat setiap perkara dalam rumah tangga pasangan tersebut. Informan 4 menambahkan bahawa ahli keluargalah menjadi sokongan ke atas pasangan yang muda yang mana perlu menyiasat dan memantau latar belakang calon pasangan tersebut. Informan 1 menambahkan: *"salah satu sebab tiada persefahaman banyak atas sebab ada pasangan yang tidak mahu mengaibkan antara satu sama lain sehingga benar-benar adanya kisah asbab sebenar melalui kaunseling rumah tangga"*. Informan 3 berpendapat: *"sebaiknya sebenarnya suami berumur lebih tua, isteri berumur yang muda sebab ada kematangan secara pemikiran.. seperti me'lead' secara langsung sebab suami menjadi ketua keluarga tetapi mengikut individu itu sendiri"*. Adapun dari segi umur sepertimana daripada kisah Rasulullah Sallallahu 'Alaihi Wasallam dengan isterinya Siti Khadijah Radhiallahu'anha tidak menjadi permasalahan langsung dalam jarak umur yang jauh apalagi perempuan lebih tua daripada lelaki. Terbuktilah jika seorang suami yang mengetahui agama, akhlak, tanggungjawab dari segi syAriah dan risiko selepas pernikahan tersebut. Informan 4 berpendapat bahawa umur tidak menjadi masalah dan tidak menjadi penghalang dalam rumah tangga: *"Umur hanyalah angka"*

sahaja..”, “yang penting redha masing-masing, redha menerima dan tahu siapa yang dikawini bersama sehingga tidak merasa ada penyesalan..tidak ada penyesalan jika sudah redha berkahwin dengan dia..”. Adapun pasangan yang tua, umur pertengahan ataupun yang sudah mencecah warga emas, informan 1 dan 4 menyatakan terjadi sebab tiada persefahaman pasangan walaupun bertahun-tahun lamanya berumahtangga; bertahan kerana anak-anak mereka sendiri bahkan ada juga disebabkan tidak lagi mampu memberikan layanan terhadap pasangan masing-masing.

Pekerjaan: Dalam menjalankan rumahtangga yang berkomitmen kerjaya adalah cabaran yang perlu diusahakan antara suami dan isteri bagi memahami bersama. Kebanyakan kes aduan rumahtangga yang dinyatakan oleh informan 1 adalah terdiri daripada isteri yang lebih berkerjaya berjawatan tinggi daripada suaminya. Kemudian informan 1 menyatakan: *“seorang isteri, setelah adanya izin suaminya untuk bekerja perlulah pandai mengimbangi tugas kerjaya dan tugasannya sebagai isteri atau ibu di rumah”.* Isteri perlu menyedari bahawa kedudukannya di dalam pekerjaan dan di dalam rumah sebagai isteri tidaklah sama; pada hakikatnya ketua keluarga adalah seorang suami. Sikap isteri yang biasanya tegas ataupun ‘bossy’ di pekerjaannya haruslah tidak terbawa ketika dia berada di rumah; boleh menyinggung perasaan seorang suami. Informan 3 mengatakan: *“perempuan yang bejawatan tinggi, mesti mengetahui serta menyedari diri sendiri akan peranan tanggungjawab sebagai isteri, yang mana suami adalah diatas isteri..”.*

Informan 1 menambahkan: *“perlu pandai membudayakan ‘worklife balance’”, “Jauhi sifat takabbur dengan kemewahan(mempunyai gaji yang tinggi) kerana dikhuatiri boleh memandang rendah terhadap kemampuan suaminya”.* Lalu informan 2 juga menyatakan: *“perempuan mestilah ada sifat qanaah..sebab dia mengetahui siapa dirinya dan siapa suaminya serta bersyukur apa sahaja pemberian si suami, kemudian meredhainya..”.* Begitu juga kepada suami yang bekerja perlu mencari waktu yang berkualiti dan mempunyai keseimbangan kehebatan di tempat pekerjaannya dengan kehebatannya sebagai seorang suami dalam keluarga dari sudut syariat Islam. Informan 3 berpendapat: *“..sama juga dengan suami mengetahui tanggungjawab dan nafkah yang wajib dijalankan untuk isterinya dan keluarganya”.* Pendapat informan 1 pula menyatakan: *“Jika perlu carilah masa berkualiti pada setiap hari dengan keluarga walaupun 2 jam sehari”;* kerana kualiti sebuah hubungan itu adalah kunci untuk mencapai persefahaman pasangan suami dan isteri. Sesibuk manapun kedua pasangan tersebut perlulah mempunyai interaksi atau komunikasi yang baik kerana kurang atau tidak mempunyai waktu bersama boleh mengarah hubungan pasangan menjadi dingin dan tiada keserasian malah terjadi ketidaksefahaman.

Adapun informan 4 menyatakan untuk mengingati pasangan suami dan isteri atau salah satunya yang mempunyai pekerjaan jika ada ketidaksefahaman bersama: *“ingatlah ayat atau kata-kata ‘I Love You’ dahulu semasa awal-awal kawin..begitulah saya memberitahu mereka ini..kenapa perlu melupakan semangat menyintai isterimu ataupun suamimu? Adakah sebab sekarang tidak lagi cantik? hodoh?”*, *“Redha itulah penting, begitulah catanya..tahu isteri bekerja..suami bekerja atau salah satunya..maka redhalah. Kesibukan bekerja sebenarnya untuk apa? Untuk menjalani kehidupan perkahwinan sekeluarga juga..tidak menjadi juga menjadi kesalahan jika perempuan sekarang bekerja..asalkan suaminya meredhainya..”.*

Kemudian informan 2 memberikan pengalaman kes aduan yang berkaitan iaitu seorang suami yang tidak mempunyai pekerjaan malah isterinya yang bekerja. Jika pasangan tersebut ada pertelingkahan antara satu sama lain maka terjadilah perkara-perkara yang terungkit. Yang mana isteri mengetahui suaminya tidak mempunyai pekerjaan dan tidak mengusahakan untuk mencari pekerjaan kerana latar belakang isteri yang berharta dan kaya sehingga dia yang memberikan dan membekalkan nafkah kepada suaminya. Pada akhirnya apa yang pernah dikatakan atau ditegur oleh ibubapa daripada isteri sebelum mereka berkahwin adalah benar; bahawa perlu meneliti dan melihat kriteria kafa'ah dari segi pekerjaan serta akhlak daripada suaminya tersebut ketika mereka belum ada talian pertunangan apalagi pernikahan. Informan 2 menambahkan: *“Baik juga mendengar kata-kata ibubapa, restu itulah sangat penting”, “Sebab itulah kafa'ah ini...ditekankan di dalam Islam..”*.

Perbezaan Bangsa dan Puak: Isu pasangan dalam perbezaan bangsa dan puak pernah terjadi dalam aduan rumahtangga yang mana informan 1 memberikan pendapat: *“Kedua pasangan mestilah berasal dari puak atau bangsa yang sama agar mereka lebih mudah menerima adat budaya dan cara kehidupan bermasyarakat puak atau bangsa tersebut”*. Adakalanya mereka merasa susah untuk menerima, memahami dan menerapkan budaya atau adat yang sudah menjadi kebiasaan dengan kehidupan tersendiri apalagi tinggal bersama ahli keluarga pasangan tersebut. Walaupun tidak semua orang sedemikian dan ada juga yang boleh menerima budaya dan adat pasangannya selagi mana ia tidak melanggar syariat Islam; larangan dan suruhan Allah Ta'ala. Kemudian informan 2 menyatakan bahawa kafa'ah sebenarnya berkaitan untuk menjaga kemaslahatan demi melindungi rumahtangga pasangan dan informan 2 memberikan contoh kes yang berkaitan daripada aduan rumahtangga: *“..dia tahu yang dijaga dari segi pemakanannya, cara makannya yang berlainan..jika isterinya tidak makan, suaminya akan merasa jauh hati dan menyatakan ‘ini masakan ibuku, walaupun ibuku ‘non-muslim’ tapi dia tahu tentang kamu ini’, jadinya Nampak bahawa cara dan adabnya yang berbeza”*. Jadinya sebagai isteri atau perempuan jika tidak mengikut cara sedemikian maka mestilah memberitahu alasan yang munasabah supaya tidak menjadi masalah yang berpanjangan. Dari sini adanya bekerja keras bagi memahami dan mengikut rentak walaupun mendiamkan diri sendiri untuk tidak menimbulkan masalah dan mengambil hati pasangan dan ahli keluarga. Informan 2 menambahkan: *“..jadinya walaupun tidak menerima semua perkara, yang penting berbuat kebaikan sahaja”, “..ambil hati semua orang sekeliling sahaja, walaupun suami daripada puak atau bangsa lain, tetap dia adalah suami kan.. kunci syurga untuknya, berbuat baik kerana mengambil hati suaminya..”*. Adapun setiap perkara yang dilakukan demi kebaikan mempunyai hikmahnya; kesabaran selama mana bertujuan untuk melindungi rumahtangga dan ia bukanlah pilihan atau suatu kewajipan tetapi terdapat saranan daripada para fuqaha dan sebagainya.

Kafa'ah Salah Satu Tuntutan Dalam Perkahwinan

Sayyid Uthman menyatakan orang-orang Islam dikenali dan diberikan dari segi kelahirannya, pekerjaannya dan tahap pangkatnya. Jadinya perkahwinan antara perempuan *syarifah* dengan lelaki yang bukan *sayyid* boleh menjadi permasalahan dan perdebatan yang berpanjangan walaupun perempuan dan walinya sangat menyukai dan bersetuju dengan lelaki tersebut. Ini

disebabkan kelahiran Arab mempunyai derajat yang lebih tinggi daripada orang yang bukan daripada Arab (Siti Suniah: 98). Kalau pun perkahwinan tersebut dilanjutkan dan diperbolehkan akan merangkumi dua permasalahan; dianggap menyakitkan perasaan Rasulullah Sallallahu 'Alaihi Wasallam dan Sayyidah Fatimah Radhiallahu'anha dan mewujudkan kemurkaan kaum *sayyid Ahlu Al-bait* kerana menghina anak cucunya (Ahmad Shofi, 2022: 97-101). Kafa'ah dalam perkahwinan telah menjadi satu pembahasan daripada beberapa ulama; kriteria kafa'ah yang paling penting ada dua aspek iaitu agama. Agama yang menjadi suatu keislaman dari segi keturunan atau tayadun dan ketaatan. Kedua iaitu kehidupan yang terdiri daripada lima kriteria iaitu keturunan, harta dan harta, fizikal (cacat atau tidak cacat), pekerjaan dan taraf merdeka atau budak (Ahmad Shofi, 2022:26). Adapun para ulama juga berbeza pendapat dari segi dalil atau hukum mengenai kafa'ah terutama sekali kafa'ah syarifah. Antaranya hadith yang dihujjahkan daripada *Ibn Umar Radhiallahu'anhu, Rasulullah Sallallahu 'Alaihi Wasallam* bersabda: (Al-Baihaqi, 2003:217. No Hadith: 13769. Hukum Hadith: Hadith Dha'if)

عن عبد الله بن عمر رضي الله عنهما قال: قال رسول الله صلى الله عليه وسلم: ((العرب بعضهم أكفاء لبعض قبيلة بقبيلة، ورجل برجل والموالي بعضهم أكفاء لبعض قبيلة بقبيلة، ورجل برجل، إلا حائك أو حجام))

Terjemahannya: “Orang arab itu sekufu satu sama lain, suku dengan suku, lelaki dengan lelaki, sedangkan mawali (para mantan budak) sekufu dengan sesama mereka, suku dengan suku, lelaki dengan lelaki, kecuali tukang tenun dan tukang bekam”

Hadith di atas adalah hadith *Dho'If* bahkan beberapa para ulama menganggap beberapa hadith yang berkaitan dengan kriteria kafa'ah dalam nasab atau keturunan adalah bertarafkan dhaif. Jadinya ia bukanlah menjadi satu ketentuan yang murni daripada syari. Akan tetapi ada juga para ulama yang berpendapat tidak sekufu dari segi nasab adalah berlawanan dengan persamaan kedudukan manusia. Sepertimana di dalam Al-Quran bahawa taraf manusia itu tidak ada suatu kelebihan diantara satu sama lain termasuklah perbezaan suku bangsa; kerana apa yang paling penting adalah ketaqwaan hambaNya kepada Allah *Subhanahu Wa Ta'ala* dengan bertujuan untuk mengenal dan menghormati sesama saudara manusia. (Ahmad Shofi, 2022:130). Dalam Surah Al-Hujurat ayat 13 sebagaimana firman Allah *Subhanahu Wa Ta'ala* :

﴿يَا أَيُّهَا النَّاسُ إِنَّا خَلَقْنَاكُمْ مِنْ ذَكَرٍ وَأُنْثَىٰ وَجَعَلْنَاكُمْ شُعُوبًا وَقَبَائِلَ لِتَعَارَفُوا إِنَّ أَكْرَمَكُمْ عِنْدَ اللَّهِ أَتْقَىٰكُمْ إِنَّ اللَّهَ عَلِيمٌ خَبِيرٌ ١٣﴾

Terjemahannya: “Maka adakah orang beriman sama seperti orang fasiq? Mereka tidaklah sama” (Mushaf Brunei Darussalam dan terjemahannya, 2014:1064)

Sepertimana Allah *Subhanahu Wa Ta'ala* telah menurunkan ayat di atas sebagai larangan bagi manusia yang membanggakan nasab atau keturunan. Maka yang paling penting dalam kriteria kafa'ah adalah kriteria dalam agama kerana semua manusia akan tetap sama

dihadapan Allah *Subhanahu Wa Ta'ala* dan hanya ketaqwaan yang boleh membezakannya. Tambahan pula daripada tafsiran Al-Qinnaui (Al-Qinnaui, 1992:153) bahawa taraf manusia itu lebih mulia dan lebih baik berdasarkan ketaqwaannya kerana mereka yang membanggakan atau bermegah-megah tentang nasab atau keturunan tidak memerlukan kemurahan hati, tidak membuktikan kehormatan dan tidak memerlukan kebajikan.

KESIMPULAN

Keadilan dalam perkahwinan itu ada di dalam Islam. Islam juga telah memberikan kepada kaum lelaki hak talaq secara mutlak yang bertujuan jika terjadinya permasalahan rumahtangga yang sudah tidak dapat lagi diselamatkan setelah sedaya upaya untuk melindungi rumahtangga dengan didikan syariat Islam, kauseling kekeluargaan dan seumpamanya. Namun ada beberapa hak talaq disalahgunakan oleh suami yang kurang bertanggungjawab. Perkara ini dapat dikaitkan sebagai jalan penyelesaian yang diberikan di dalam Islam dengan mempertimbangkan kriteria-kriteria kafa'ah sebelum melanjutkan sebuah pernikahan. Jadinya pihak perempuan itu lebih baik berusaha untuk memilih pasangan calon suami sebaik mungkin dengan yang bagus memahami tugas dan tanggungjawab sebagai selayaknya suami serta memahami konsep pemakaian talaq dalam syariat Islam yang akan dimiliki setelah perkahwinan. Tidak akan ada manusia sesempurna yang diinginkan seperti memenuhi kriteria-kriteria kafa'ah sepenuhnya sepertimana disebutkan oleh para fuqaha. Namun penyampaian tentang kriteria-kriteria kafa'ah yang disepakati oleh para ulama merupakan jaminan kebahagiaan dan kesejahteraan dalam sebuah perkahwinan. Walaupun kebanyakannya mereka tidak mempunyai kriteria-kriteria kafa'ah secara menyeluruh maka yang paling diutamakan dalam syariat Islam adalah kriteria dari segi agama. Agamalah memutarakan kesan dan hasil seluruh kehidupan seseorang apatah lagi bertambahnya ahli keluarga selepas akad perkahwinan. Maka kegagalan tetap menjadi kesan yang buruk jika meneruskan perkahwinan dalam perbezaan agama diantara suami dan isteri daripada beragama Islam yang sama kedua pasangan tersebut (Nasarudin Latif, 2001: 101). Tetap kriteria kafa'ah dalam agama adalah paling utama walaupun setiap individu mempunyai kebebasan untuk memilih pasangan sebagai calon suami atau isteri yang dianggap sekufu atau setaraf (Siti Nur Husna, 2020: 4). Kehidupan keserasian suami isteri dalam perkahwinan adalah perkara yang cukup menarik dengan adanya seorang ayah dan seorang ibu yang menjadi garis tujuan pernikahan yang mana memang jika seseorang itu sudah menentukan proses pencarian atau perijodohan pasangannya sebagai suami atau isteri akan terus melanjutkan kearah perkahwinan yang halal (Hasan Basri, 1996:117). Walaupun kafa'ah atau sekufu atau kesefahaman dalam perkahwinan tidak diatur oleh undang-undang perkahwinan atau di dalam Al-Quran, tetap menjadi kepentingan untuk mewujudkan rumahtangga yang harmoni dan tenteram. (Dr. H. Kosim, M.Ag, 2019: 44)

RUJUKAN

- Abi Al-Qasim, Mahmud Bin Abd Al-Rahman. (1986). *Bayan Al-Mukhtasar Sharh Mukhtasar Ibnu Al-Hajib*. Saudi: Dar Al-Madani.
- Abd Al-Hamid Umar, Ahmad Mukhtar. (2008). *Mujam Al-Lughah Al-Arabiyyah Al-Muasirah*. Beirut: Alim Al-Kutub.

- Ahmad Azaim Ibrahimy-Nawawi-Muh. Nashirudin. (2020). *Kriteria Kafa'ah Dalam Perkawinan: Antara Absolut-Universal Dan Relatif-Temporal*. Indonesia: Jurnal Ilmu Syari'ah Dan Hukum.
- Ahmad Royani. (2013). *Kafaah Dalam Perkawinan Islam (Tela'ah Kesederajatan Agama Dan Sosial)*. Jurnal: Al-Ahwal.
- Ahmad Shofi. (2022). *Menyoal Kafa'ah Syarifah: Studi Kritis Pemikiran Fikih Sayyid Utsman Bin Yahya Tentang Kafa'ah Syarifah*. Indonesia: Penerbit A-Empat Edisi 1.
- Ahmad Mustafa Al-Maraghi. (1946). *Tafsir Al-Maraghi*. Mesir: Mustafa Al-Bab Al-Halabi.
- Aiman Azlan-Dr.Harlina Halizah Siraj. (2022). *Sekufu: Bina Keserasian & Bentuk Persefahaman Dalam Rumah Tangga*. Malaysia: Iman Publication.
- Al-Habib Bin Tahir. (2005). *Al-Fiqh Al-Maliki Wa 'Adillatuh*. Beirut: Muassasah Al-Maarif.
- Al-Husaini, Muhammad Bin Muhammad Bin Abd Al-Razaq-'Abu Al-Faid-Al-Mulaqqab Bi Murtada. (T.T). *Taj Al-Urus Min Jawahir Al-Qamus*.
- Al-Baihaqi, Ahmad Bin Al-Husain Bin Ali Bin Musa Al-Khusrawjirdi Al-Kharasani. (2003). *Al-Sunan Al-Kubra*. Lubanan: Dar Al-Kutub Al-Ilmiyyah.
- Al-Hamdani. (2002). *Risalah Nikah (Hukum Perkahwinan Islam)*. Jakarta: Pustaka Amani.
- Al-Jaziri. Abd Al-Rahman Bin Muhammad. (2003). *Al-Fiqh A'la Al-Mazhab Al-'Arbaah*. Lebanon: Dar Al-Kutub Al-Ilmiyyah.
- Al-Marghinani, Burhan Al-Din Ali Bin 'Abi Bakr. (2006). *Al-Hidayah Sharhu Bidayah Al-Mubtadi*. Mesir: Dar Al-Salam.
- Al-Maliki, 'Abu Al-Abbas Shihab Al-Din 'Ahmad Bin 'Idris. (1994). *Al-Dhakhirah*. Tunisia: Dar Al-Gharb Al-'Islami.
- Al-Mishri, Syaikh Mahmud. (2010). *Bekal Pernikahan*, Jakarta: Qisthi Press.
- Al-Qazwini. (T.T). *Sunan Ibn Majah*. Mesir: Dar 'Ihya' Al-Kutub Al-'Arabiyyah.
- Al-Qinnaui. 'Abu Taib Muhammad Saddiq Khan. (1992). *Fathu Al-Bayan FI Maqasid Al-Quran*. Sidon: Al-Maktabah Al-Asriyyah Lil Tabaah Wa Al-Nashr.
- Al-Qurafi, Shihab Al-Din 'Ahmad Bin 'Idris. (1995). *Nafa'is Al-'Usul FI Sharhi Al-Mahsul*. Beirut: Maktabah Nizar Mustafa Al-Baz.
- Al-Qurtubi. 'Abu Al-Walid Muhammad Bin 'Ahmad Bin Muhammad. (2004). *Bidayah Al-Mujtahid Wa Nihayah Al-Muqtasid*. Mesir: Dar Al-Hadith.
- Al-Sayyid Al-Bakri. *I'nanah Ath-Thaalibin*. Daar Ihya' Al-Kutub Al-'Arabiyyah.
- Al-Shairazi. (1996). *Al-Muhazhab FI Fiqhu Al-'Imam Al-Syafi*. Damsyik: Dar Al-Qalm.
- Al-Syafi'i, Sulaiman Bin Muhammad Bin Umar Al-Bujairami. (1950). *Al-Tajrid Linafi Al-Abid = Hashiah Al-Bujairami Ala Sharhi Al-Manhaj (Manhaj Al-Tulab Ikhtasaruhu Zakariyya Al-'Ansari Min Manhaj Al-Talibin Lil Nawawi Thumma Sharahahu FI Sharhi Manhaj Al-Tulab)*. Mesir: Matbaah Al-Halabi.
- Al-Syarbini, Muhammad (1994). *Mughni Al-Muhtaj*. Beirut: Dar Al-Kutub Al-Ilmiyyah.
- Al-Syafi'i. 'Abu Abdulullah Muhammad Bin 'Idris Bin Al-Abbas. (1990). *Al-'Um*. Beirut: Dar Al-Marifah.
- Al-Tunisi. Muhammad Al-Tahir Bin Muhammad. (2004). *Maqsid Al-Syariah Al-'Islamiyyah*. Qatar: Wizarah Al-'Auqaf Wa Al-Syu'Un Al-'Islamiyyah.
- Al-Zarkashi, 'Abu Abdullah Badr Al-Din Muhammad. (1994). *Al-Bahr Al-Muhit FI 'Usul Al-Fiqh*. Beirut: Dar Al-Kutubi.

- Al-Zuhaili, Wahbah Bin Mustafa. (1997). *Al-Fiqhu Al-'Islami Wa 'Adillatuhu*. Syria: Dar Al-Fikr. Bab Ahwal Al-Shakhsiyyah.
- Al-Zuhaili, Wahbah Bin Mustafa. (2010). *Mawsuah Al-Fiqh Al-'Islami Wa Al-Qadaya Al-Muasarah*. Damsyiq: Dar Al-Fikr.
- Al-Zuhaili, Wahbah Bin Mustafa. (T.T). *Al-Fiqhu Al-'Islami Wa 'Adillatuhu*. Syria: Dar Al-Fikr.
- Ashwab Mahasin, M.H. (2020). *Reinterpretasi Konsep Kafa'ah (Pemahaman Dan Kajian Terhadap Maqasid Syariah)*. Jurnal: Al-Syakhsiyyah, Jurnal Undang-Undang Dan Keluarga. Jil 2. No 1.
- Azme Matali – Nor Hafizah. (2019). *Komplikasi Isu-Isu Maqasid Syariah Sebagai Pemangkin Negara Makmur Di Negara Brunei Darussalam*. Brunei Darussalam: UNISSA Press. Bahagian 2. (Hajah Siti Khadzinah – Hajah Norashikin. Maqasid Syariah Dalam Fatwa Mufti Kerajaan Berkaitan Amalan Masyarakat Brunei)
- Gustiawati, Syarifah Dan Novia Lestari. 2016. *Aktualisasi Konsep Kafa'ah Dalam Membangun Keharmonisan Rumah Tangga*, Indonesia: Jurnal Ilmu Syariah.
- Hajah Nur Anisah Syahirah. (2015). *Maqhum Al-Kafa'ah FI Al-Nikah FI Al-Fiqh Al-'Islami Wama Alaihi Al-Amal FI Brunei Darusslam*. Tesis Sarjana: UNISSA.
- Hasan Basri. (1996). *Merawat Cinta Kasih*. Yogyakarta: Pustaka Pelajar.
- Ibn Manzur, Jamal Al-Din-Abu Al-Fadl -Ibn Mukarram, Muhammad. (1414). *Lisan Al-Al-Arab*. Lebanon: Dar Sadir.
- Ibn Abidin. (2003). *Raddu Al-Mukhtar A'la Al-Dur Al-Mukhtar Syarhu Tanwir Al-Absar*. Riyadh: Dar 'Alam Al-Kutub.
- Ibnu Al-Dahak -Al-Tirmizi -Abu Isa. (1998). *Al-Jami Al-Kabir – Sunan Al- Tirmidhi*. Beirut: Al-Ghurb Al-'Islami.
- Ibnu Abbas, Abdullah. (T.T). *Tanwir Al-Maqbas Min Tafsir Ibnu Abbas*. Lebanon: Dar Al-Kutub Al-Ilmiyyah.
- Ibnu Atiyah, 'Abu Muhammad Abdul Al-Haq Bin Ghalib. (1422). *Al-Muharrar Al-Wajiz Fi Tafsir Al-Kitab Al-Aziz*. Beirut: Dar Al-Kutub Al-Ilmiyyah.
- Ibnu Sulaiman, Abd Al-Rahman Bin Muhammad (T.T). *Mujma Al-'Anhar FI Sharhi Multaqa Al-'Abhar*. Beirut: Dar 'Ihya' Al-Turath Al-Arabi.
- Khoiruddin Nasution. (2007). *Isu-Isu Kontemporer Hukum Islam*. Yogyakarta: Suka Press.
- M. Hasyim Assagaf. (2000). *Derita Putri-Putri Nabi: Studi Historis Kafa'ah Syarifah*. Bandung: PT. Remaja Rosdakarya.
- Miszairi, S - Mustafa, M. J. @Shamsuddin. (2018). *Pensyaran Kafaah Di Dalam Akad Nikah Dan Amalannya Di Dalam Undang-Undang Keluarga Islam Di Malaysia*. M. K. U. I. Melaka (Ed.), Konvensyen Serantau Pengajian Islam Regional Convention On Islamic Studies (Rcis 2018) Peringkat Antarabangsa Siri Ke-4.
- Muhammad Jawad. (2007). *Fiqh Lima Mazhab*. Indonesia: Lentera.
- Muhammad Abu Zahrah. (1957). *Aqd Al-Zawaj Wa Asaruh*. Mesir: Dar Al-Fikr Al-Arabi.
- Muhammad Zaidan. (2009). *Al-Kafa'ah Fi Aqd Al-Nikah*. Jurnal Silsilah Al-Dirasat Al-Islamiyyah.
- Mustafa Al-Siba'I. (1965). *Sharh Qanun Al-Ahwal Al-Syakhsiyyah*. Damaskus.
- Mujma Al-Lughah Al-Arabiyyah Bi Al-Qahirah. (T.T). *Al-Mujam Al-Wasit*. Beirut: Dar Al-

Dawah.

- Mushaf Brunei Darussalam Dan Terjemahannya*. (2014). Negara Brunei Darussalam: Pusat Da'wah Islamiah.
- Musthafa Kamal Pasha. (2002). *Fikih Islam*. Yogyakarta: Citra Kursa Mandiri.
- Abdurrahman Al-Jaziri. (2003). *Kitab Al-Fiqh A'la Al-Mazahib Al-Arbaah*. Beirut: Dar Al-Kutub Al-Ilmiyyah.
- Aqlah, Muhammad. (2002). *Nizam Al-'Usrah FI Al-'Islam*. Urdun: Maktabah Al-Risalah Al-Hadithah.
- Nasarudin Latif. (2001). *Ilmu Perkahwinan: Problematika Seputar Keluarga Dan Rumahtangga*. Bandung: Pustaka Hidayah.
- Nurul Fatah. "Hukum Pernikahan Syarifah Dengn Laki-Laki Non-Sayyid: Perspektif Jam'iyyah Rabithah Alawiyyah Yogyakarta".
- Qudamah, Ibnu. (2012). *Al Mughni*. Jakarta: Pustaka Azzam.
- Rusyd, Ibnu. (2007). *Bidayatul Mujtahid Analisa Fiqih Para Mujtahid Cet. III*. Jakarta: Pustaka Amani.
- Sabiq, Sayyid. (2010). *Fiqh Sunnah 3*. Jakarta: Pena Pundi Aksara.
- Sabiq, Al-Sayyid. (1981). *Fiqh As-Sunnah*. Bandung: PT Al-Ma'arif.
- Shihab, M. Quraish. (1999). *Wawasan Al-Qur'an*. Bandung: Mizan.
- Siti Nur Husna. (2020). *Konsep Kafa'ah Dalam Perkahwinan – Siri 23*. Malaysia: Uitm.
- Siti Suniah. "Kritik Terhadap Tarekat: Kajian Terhadap Pemikiran Sayyid Usman Bin Yahya".
- Slamet Abidin Dan Aminuddin. (1999). *Fiqh Munakahat*. Bandung: CV Pustaka Setia.
- Syarifuddin, Amir. (2006). *Hukum Pernikahan Islam Di Indonesia: Antara Fiqih Munakahat Dan UU Pernikahan*. Jakarta: Kencana Prenada Media Group.
- Umar Faruq Thohir. (2018). Korelasi Pendapatan Ekonomi Dan Kedewasaan Pasangan Terhadap Keharmonisan Rumahtangga Pelaku Pernikahan Di Bawah Umur Di Desa Wedusan, Tiris, Probolinggo. *Jurnal Hukum Islam: Asy-Syari'ah*.
- Wuzarah Al-'Auqaf Wa Asy-Syu'Un Al-Islamiyyah Al-Kuwait. (1995). *Al-Mausuah Al-Fiqhiyyah Al-Kuwaitiyyah*. Kuwait: Dar Ash-Shafwah.
- Zahrotun Nafisah - Uswatun Khasanah. (2018). *Komparasi Konsep Kafa'ah Perspektif M. Quraish Shihab Dan Fiqh Empat Mazhab*. Indonesia: Jurnal Studi Hukum Islam.